

**Date – 04/04/2026**

**Time - 18:30 -18:40Hrs**

**AKASHVANI AIZAWL**

**REGIONAL NEWS BULLETIN**

**HEADLINES ( EVENING )**

1. Health Minister Pi Lalrinpuii chuan Mizoram Synod-in an kohhran mi harsa te'n MUHCS an zawm theihna tura hma a la chu lawmawm a tih thu a sawi.
2. Champhai district Police te chuan tun thla ni 3 chhung khan heroin kg 2 leh gram 402, cheng vaibelchhe 4 leh nuai 76 chuang hu zet an man.
3. State 4 leh UT 1 Assembly inthlan atana campaign chuan a vawrtawp a thleng mek.
4. Ramchhunga voter ten Assembly inthlana an bial chhunga ding turte nihna dik tak ECINET Platform atangin an en thei tih ECI chuan a puang

<><><>

**HEALTH MINISTER - CHURCH**

Health Minister Pi Lalrinpuii chuan Mizoram Synod-in an kohhran mi harsa te'n MUHCS an zawm theihna tura hma a la chu lawmawm a tih thu a sawi.

Health Minister Pi Lalrinpuii chuan social media kaltlangin he thu hi sawiin Kohhran lian ber atanga thawhpuina tha tak an dawng chu lawmawm a tih thu a sawi a. Anni lam pawh hmasawn zel tura an inbuatsaih sauh sauh tur thu a sawi bawk a ni. Mizoram Synod chuan an hnuai tualchhung kohhran hrang hrang te chu an member harsa te'n Mizoram Universal Health Care Scheme (MUHCS) an zawm theihna tura hma la turin a ngen a. He thu hi Mizoram Synod Secretary Rev. B Zohmangaiha lehkha, thla hmasa ni 23-a tihchhuahah tarlan niin tunah hian tualchhung Kohhran hrang hrang Secretary te'n lehkha hi an dawng tan mek a. Mizoram Synod chuan Mizoram sorkarin Health care scheme a neih mek, MUHCS chungchang chu Officer's Meeting (OM) chuan ngun taka an ngaihtuah hnuin tualchhung kohhran ho-ah an kohhran member te retheihna avanga zawm ve thei loten an zawm ve theihna tura a tul anga hma laksak tura ngenna siam ni se tiin thu a ti tlu ta tih lehkhaah hian an tarlang a ni.

<><><>

## EMCC VIOLATIONS

Tun thla April ni 21 a Aizawl Municipal Corporation (AMC) bial/ward 19 inthlan vote thlak lo awm tura Election Model Code of Conduct (EMCC) bawhchhia a puhna tam tham tak a lut tawh.

Hriat theih chinah Principal Chief Conservator of Forests (PCCF) pisa-in March ni 21 a LDC (provisional employee) atana mi 15 lakna tur advertisement an lo chhuah chu State Election Commission chuan a ngai thutak hle a. EMCC bawhchhian a nih thu PCCF leh advertisement lo tihchhuahsaktu Director, Information & Public Relations chu insawifiah tura tih an ni a. State Election Commission hmaah inlanin, an thil tih cancel tira ngaihdam an ni. Thla hlui (March) ni 18 a AMC inthlan puan a nih atanga ni 28 thleng khan hna lak, advertisement chhuah, hna lakna atana interview leh sorkarin inkhawm buatsaih ang chi dilna chi hrang hrang 16 chu SEC-ah a lut a. EMCC tlawhchhana dilna 16 lut zinga 6 hi tih khapsak an ni a. Dilna 6 chu intiamkamna nen phalsak an ni a, pakhat chu exempt a ni a, a dang zawng chu thurawn pek an ni.

State Election Commissioner Dr. H. Lalthlangliana chuan hna leh ruahmanna kal laklawh lai chu ngaihnathiam a nih rualin thil thar, eng political party berin emaw inthlanna a hlawkna an tel theihna tur ang chi chu khap a nih thu a sawi a ni.

<><><>

## LADC BUDGET SESSION

Ni 4 chhung awm Lai Autonomous District Council (LADC) Budget Session chu Ningani khan a ni a, kum 2026-2027 LADC Sum hman tura ruahman cheng vaibelchhe 280. Leh nuai 28 chuang chu lungrual taka pawm a ni.

March Ni 27 atanga tan LADC Budget Session ah hian Member pahnih Pu A. Thangruma leh Pu Puspa Ranjan Chakma te sunna hun hman ani a. Session tan ni-ah Deputy Chairman atan chuhtu awm chhun Pu C. Lalneihkhuma, Vathuampui Bialtu chu thlan a ni a. Members atanga zawhna lut 31 te chu chhan vek an ni a, Official Business LADC(Marriage and Divorce)(First Amendment) Bill 2026 chu sawih hnu-ah pawm a ni a. Private Member Resolution Pu L.R. Dingliana Chinzah, AOC Bialtu putluh "Budget kum 2026-2027 chhung atan Year of Consolidation ah puan ni rawh se," tih chu sawihona hnu ah hnawl a ni.

LADC Budget Session zawh takah hian tangka kum 2026-2027 chhunga Budget pumpui hi cheng vaibelchhe 280, nuai 28, sing 6 leh sang 3 niin tualchhunga chhiah lak khawm atangin cheng nuai 510.00 hmuh beisei a ni a, hei hi kum kalta aiin cheng nuaih 89 in a tam zawk a ni. Grand In Aid, Mizoram sorkar atanga dawn tur cheng vaibelchhe 273, nuai 36, sing 1 leh sang 3 niin, kum kalta aiin cheng vaibelchhe 15, nuai 84, sing 5 leh sang 6 in a tam zawk bawk a ni.

<><><>

## HEROIN HAUL

Champhai district Police te chuan tun thla ni 3 chhung khan heroin kg 2 leh gram 402, cheng vaibelchhe 4 leh nuai 76 chuang hu zet an man.

Mizoram sorkarin 'Operation Jericho' hming vuaha ruihhlo do beihpui a thlak hun pawhsei a tawp ni, March ni 31 hnu atangin ruihhlo tam tham tak a lo lut leh ni a thu dawn a ni a, nimin pawh khan Champhai district Police-te chuan Chalbawia Junction, Khankawn Police Check Gate-ah car pakhat atangin heroin kg 1 leh gram 860 an man a. He ruihhlo, cheng vaibelchhe 3 leh nuai 72 hu a chhut car a phurtu Zothangpuia (34), Khawmawi khua, Myanmar, tuna Zokhawthara awm mek leh a car a chuang Hawiliankhupa (23) Tongpila khua Myanmar, tuna Melbuk khua a awm mekte chu an man a. Champhai Police Station-ah Narcotic Drugs & Psychotropic Substances Act, 1985 section 21(c)/25/29 bakah Immigration and Foreigners Act, 2025 section 21 hmanga thubuai ziahluh a ni.

Thu zawhfiahna-ah he ruihhlo thawntu ni a rinhlelh Lalneihthanga(32) Chekan khua, tuna Khawmawi khua Myanmar a awm mek chu Police te hian an mi mante hmanga bum chhuakin Champhai Zotlangah an man a. Ani rual hian a tiam rualpui Laltanpuia(36) Chekan khua, Myanmar, tuna Zokhawthar khua a awm mek pawh an man tel bawk.

He mi hma Nilaini, April ni 1 zan khan Champhai district Police te vek hian Zokhawthar Presbyterian Kohran biak-in bulah heroin gram 247 manin a neitu a puh Zokhawthar a khawsa mek Vanlalchhuanga (30), Letpanchhawng, Kalemio District, Myanmar chu an man a. Zokhawthar Police Station-ah hrengin thubuai ziahluh a ni a. April ni 1 vek hian Chalbawia Junction, Khankawn Police Check Gate-ah heroin gram 231 leh a neitu a puh, ruihhlo phurhna car khalhtu Ashifur Rahman (28) leh Jamrul Hoque Khan (26) Karimganj district, Assam a cheng ve vete chu man an ni a. Hemi ni vek chawhnu lamah Chhungte khaw chhung kawng peng thumamah Champhai Kahrawt venga cheng Lalduhkima (52) chu a hroin kawng gram 46 nen man a ni bawk.

Puan tawh angin Excise & Narcotics department hnathawkte pawhin Nilaini vek khan Kolasib Khuangpuilam-ah Heroin Kg 1 & gram 252 an lo man tawh bawk a. Manipur atanga heroin rawn phur thlatu 2 an man zinga pakhat hi Manipur Police department a thawk lai mek a ni.

<><><>

**MJA**

Vawiin khan Aizawl Press Club-ah Mizoram Journalists' Association (MJA) General Headquarters hruaitu atana thlan tharte hnenah charge hlan a ni.

President kalchhuak C. Lalrambuatsaiha chuan President thlan thar Vanlalrema Vantawl hnenah charge a hlan a. Vice President C. Lalhmachhuana, Youth Herald chuan a post ngai a chelh nawn leh a. Treasurer kalchhuak Lalrinmawia Sailo chuan Treasurer thar Zohmingmawia hnenah charge a hlan bawk a ni.

President thar Vanlalrema Vantawl chuan MJA hmalakna tur sawiin, Press Club culture tihnun leh a ngaih thu a sawi a. Welfare ah hmalak a tul thu sawiin hmarchhak state journalist welfare-ah Mizoram chu a nei tha zingah an tel pha lo tih sawiin welfare mumal zawk nei turin theihtawp chhuah a tul thu a sawi a. News lamah inel a tul tih sawiin hemi atan hian platform siam an tum dawn thu a sawi bawk a ni.

MJA President chuan MJA Constitution tlawhchhanin General Secretary leh Secretary pathum a ruat nghal.

General Secretary atan K. Zothanpara, Vanglaini bakah Secretary atan H. Lalchhandama, The Zozam Times i/c Organisation, Property, Finance; Samuel Lalruatsanga, Zonet TV i/c Information and Publicity, Protocol; leh Lalbiakzama, Entlang i/c Welfare a ruat bawk a. Executive Member atan mi 5 a ruat bawk a ni.

<><><>

#### ZPM – AMC POLLS

ZPM Thalai President Pu Jeje Lalpekhluva, MLA chuan MNF kaihhruai AMC sorkar in Mizoram leh Aizawl mipuite hnam angin a ti mualpho tih a sawi.

Vawiina thuchhuah an siamah Pu Jeje Lalpekhluva chuan CAG Report in MNF Sorkarna hnuai Aizawl Municipal Corporation chu bawlhhlawh paihna truck 45 a tihral danah a sawisel a, hei vang hian state sum cheng nuai 3 sing 1 leh sang 6 a hloh tih a sawi a. MNF Sorkar-a AMC te thil tih dan CAG Report-in a tarlan danin, SIPMIU, Aizawl chuan Oct ni 3, 2017 khan khawpui chhunga bawlhhlawh paihna tur lirthei thar Truck (Tipper) 50 leh Pickup pali - 4 te chu MNF kaihhruai AMC hnenah an hlan tih a sawi a. A vaiin cheng vbc 10 leh nuai 28 man niin heng an motor hlan te hi kum 2018 khan MNF kaihhruai AMC Sorkar khan tlawm uchuak takin a tiral leh vek tih a sawi a.

Mizoram Condemnation and Disposal of Government Vehicles Rules, 2011-in a tarlan danin lirthei te hi kum 10 a tlin hnuah emaw km nuai 2 a tlan tlan hnuah chauh tihral phalna a pe tih Pu Jeje Lalpekhluva chuan a sawi a. Lirthei-in chetsual a tawh palh a, sum leh pai lama siamthat theih loh a nih chauhvin a hun hmain an tiral thei ang tih danah hian a awm bawk tih a sawi a. AMC board of councillors chuan Dec 2018 khan bawlhhlawh paihna truck-te chu Privatise turin thutlukna an siam a tih a sawi a. Technical inspection-ah lirthei te hi an dinhmun a tha tih finfiah chungin official-te chuan ‘Economic repair atan an fit tawh lo’ tiin an thutlukna an siam a, Motor 1 zelah cheng nuai 5, sing 6 leh sang 4 chauh in an duhsak zawngte hnenah a pe tih a sawi a. Hetiang taka CAG report in MNF AMC Sorkar avanga Aizawl mipuite leh Mizo mipuite induhsakna uchuak tak hmanga hmai a ti bal ta mai chu ZPM Thalai chuan pawl an tih thu a sawi a ni.

<><><>

#### AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

#### MNF

MNF thalai President Pu Robert Romawia Royte, MLA chuan kum liam ta 2025-26 chhunga SASCI sum kir leh ‘lapse’ cheng nuai sing 3 chuanga Chief Minister, Finance Minister ni bawk chuan mawh la ngam se a duh thu a sawi.

Vawiina Aizawl Press Club-a chanchinbumite a kawmnaah he thu hi sawiin Pu Robert Romawia Royte chuan ZPM sawrkar tirh 2023-24 kum khan SASCI Part-1 sum sanctioned sa thlap cheng nuai 23,331 chu 1st Instalment sum a Implementing Department a pek tlai avangin a lapse vek tawh tih a sawi a. He hi Assembly thutkhawm vawi 9-na session tum 6 naah a zawhna chhannaah ngemngheh a nih thu a sawi a. Tun tumah hian SASCI sum lapse tharlam a awm leh tih sawiin Pu Robert Romawia Royte chuan kum 2025-26-ah SASCI Part I hnuaiah Mizoram tan cheng nuai 32,800 dah sa a nih thu a sawi a. SASCI SASCI Part-I dan angin Rs 32,800 lakh a zaa 66, cheng nuai 21,648 chu 1st Instalment-ah Mizoram sawrkar-ahrawn release nghal a nih thu a sawi a. He tah hian mak tak erawh chu 1st Instalment Rs 21,648 lakh chu dawng reng siin UC an submit theih loh avangin a 2nd Instalment sanctioned sa thlap cheng nuai 11,152 chu a lapse leh ta vek tih a sawi a.

Heti hian tun ZPM sorkar kum 2 leh tlem chhung lekin SASCI Part-I hnuaiah vawi 2 sum tam tham tak, cheng nuai 34,483 a lapse tih a sawi a. An sorkar lain engmah lapse a awm ngai lo tih sawiin a thuneitu mawh liau liau a nih thu a sawi a ni.

<><><>

## **ELECTION CAMPAIGN**

State 4 leh UT 1 Assembly inthlan atana campaign chuan a vawrtawp a thleng mek a. Keralam ah chuan karleh April ni 9 ah vote thlak tur niin campaign boruak a sang hle a. Rampum huapa party hruaitu ten hmun hrang hrangah election rally an buatsaih a. Prime Minister leh senior BJP leader Narendra Modia chuan vawiin chawhnu khan Thiruvalla leh Thiruvananthapuram-ah NDA campaign a neih pui a. Hemi hnu hian Thiruvananthapuram a pan leh a. Koramana atanga Killipalam-ah kawngzawh a huaihawt leh bawk a ni.

Lok Sabha Opposition leader leh Congress hruaitu Rahul Gandhi pawhin vawiin khan Alapuzha ah thu a sawi a. Hei bakah hian Idukky leh Ernakulam district ahte UDF tan a campaign bawk a. Kerala Chief Minister leh senior CPI(M) leader Pinarayi Vijayan chuan vawiin khan Kannur-a Dharmadom bialah campaign-na hun a hman a. Anni bakah hian Union Ministet te, leh Star campaigner ten hmun hrang hrangah beihpui an thlak mek a ni.

<><><>

## **ECINET**

Ramchhunga voter ten Assembly inthlana an bial chhunga ding turte nihna dik tak ECINET Platform atangin an en thei tih ECI chuan a puang. He platform atang hian an bial chhunga candidate te zirna lama an thiamna te, thubuai an neih leh neihloh te a en theih vek a. Candidate ten affidavit an thehluh hi voter ten a kimchangin an download thei bawk a ni. ECINET hi khawvela eletoral service platform lian ber a ni a. Election Commission chuan inthlan kaihnawihha apps siam 40 chuang huikhawmin he platform hi a udang a ni.

<><><>